

心

知

堂

詩

稿

心知堂詩稿卷三

成都汪仲洋少海

下峽集下

起辛酉十二月迄壬戌十一月道中作

三遊洞

昔自樂天自江州司馬遷忠州刺史與弟知退偕行元微之自通州司馬遷虢州長史遇于樊陵同遊此洞各

賦詩二十韻白記其事以名焉二蘇公亦嘗侍老泉遊此各有詩載集中

我不能如樂天知退偕元稹又不能如東坡穎濱侍蘇  
洵何由短句長歌摩崖書姓字留鎮洞天上下千古爭  
精神扁舟曉出西陵水未問白雲心已喜纔由曲磴穿  
藤蘿緩步逍遙八九里高低回合響松濤轉似重行三  
峽裏危峯軒然空際來蜿蜒徑路橫腰開高無一丈寬  
無尺其光若鏡知從盤古以後億萬足跡相摩揩短短

闌干防失足澄潭黝黑藏黃能霜飛木落晴空淨此物  
聲欬成轟雷魂驚魄動立難久不于而前競恐後石扉  
訇然當面分碧眼山僧導客走玲瓏几案紛東西雜沓  
旗幡忘左右居然別有天豈止室如斗佛像亦神奇兜  
羅垂兩肘窮幽忽訝錯陰陽對面不辨爲誰某以火四  
照如夜遊嵌空玲瓏無不有洞底有洞疑層樓洞外有  
洞怪通牖造化無心成結構何嘗盡假巨靈手可信營  
窟營巢皆善因宮室所興非聖人十二萬年乾坤原不  
變還將此洞錫與初開混沌之遺民

至喜亭

即歐陽公爲作記者在鎮陵州南  
州舊有公手植紅梨花已不復存

居然漚酒慶更生萬里波濤到岸登百代文章推永叔

三分割據定彝陵梨花不復開春雨却火猶然散鬼燈  
第一征程離故國可堪回首最高層

泊枝江庾臺寺下

小縣羅侯國荒祠庾子庭江分雲夢綠山接楚吳青獵  
騎因秋出漁歌隔葦聽船頭明月上今夜泊沙汀

沙市

小聚權爲市長堤竟障川人煙三戶後風俗百蠻先稅  
薄惟輸布湖平半種蓮誰知魚是飯舉網勝耕田

武昌弔左良玉

長身頰面左右射不怕主帥只怕賊縱賊自重兵間居  
縱兵擄掠賊不如跋扈驕亢更殘忍肘後顧盼黃金印

天威不省憚懷宗私恩詎解感侯恂戰功略著瑪瑙山  
精銳盡喪朱仙鎮倉皇避賊走襄陽因賊西去來武昌  
居然元戎開幕府笳鼓聲中江漢長目不知書類石趙  
黃鶴樓頭屢憑眺中原陸沈非我責鼎湖龍去不須悼  
蘇生度曲柳說書心肝已死還遣耗南都屏蔽鄂渚宮  
蔭子世襲宏光中招募降賊數十萬一山一幟張軍容  
此軍不足誅李闖亦不能殺張獻忠只堪耀武懾馬阮  
塗面之粉如乃公三十六營過隊馬黃澍激之順流東  
此行老諄死期速初意詎爲太子獄王敦桓溫往事雖  
不知錢鳳郗超之輩或者導誘計已熟舳艫銜尾二百  
里九江未過舉軍哭嗚呼正辭難脅袁繼咸同名早愧

秦良玉委之病亂吾不服

自漢口乘二把手小車至武勝關遇雪

前者挽後者推非擔非負小車來後者歌前者和如輿如馬小車過時降亦時登可眠兼可坐未知行到關但訝青山破遠樹排排天四低彤雲忽起山光迷雪花滿地滑於脂況有迎頭風亂吹乘車客有若錯掛布帆收不得御車人有若汭流江水覆難測手足鮮從心耳目皆爲力十步再趑趄經時無一尺暝色西來難久立此夜村煙何處入縱免盜賊飽豺狼翻然下車相對泣

朱僊鎮謁岳忠武王廟

當時叩馬小書生料盡機宜兀朮營玉斧兩朝餘敗局

金牌千里止奇兵  
秋來白雁歌終驗  
塞外黃龍酒未傾  
愁絕汴河鳴咽水  
竟將三字壞長城

汴梁懷古

郊天猶未赴伊陽  
已報沙陀入大梁  
河上逍遙段招討  
禁中涕淚敬平章  
讐仇破國無生理  
盜賊餘波已擅場  
史筆歐陽傳死節  
豹皮千載獨留芳

冊立南朝本契丹  
再傳何事構兵端  
牋書漫上翁皇帝  
職貢誰稱天可汗  
晉代元勲空誤國  
石家尊戚竟懷奸  
堪憐戟手回頭罵  
砂磧遺魂識路難

陳祖幸逢侯景亂  
赫連陰伺寄奴東  
帝昶倘未歸燕塞  
木拐何由入汴宮  
天福稱年蒙石晉  
高光廟祀類劉聰

無端後世師蒞醢一角黃旗裏郭公

畫裏均田考古知錦囊盛策賞功奇農桑禮樂開王業  
秦隴淮徐拓霸基氣壓契丹猶部落人忘宋祖在偏裨  
英風蓋世年華促慨息雄州返旆時

黃袍著體便回軍點檢居然受冊真唐代府兵歸宿衛  
漢家州郡屬文臣傳杯解盡干戈劫贊像開先理學新  
獨恨封椿籌遠畧燕雲隔斷瓦橋濱

龍行虎步帝王真金匱盟詞叛見聞絕少何充爭舊典  
更無宋穆念先君頡羹非怨恩偏薄尺布興歌謗更紛  
南渡百年歸嫡派始知天道善平分

慨息澶淵不再盟只餘留守住東京居然祖逖招屯塢

那有桓宣助義兵恢復功虛還汴表英雄命盡渡河聲  
鄂王詔獄斬王老一樣魂飛五國城  
宣哀作述總倉皇纔棄中都又汴梁我憶拖雷猶兀朮  
人言崔立似邦昌青城獻納仍前地內府津搬本舊章  
賴有楚材祈赦宥生靈百萬度滄桑

蘭陽渡河

涼風捲地聲如鴟河流一片黃琉璃欲濟未濟敲冰時  
但覺貂裘寒不支白髮船頭雙淚落短褌到胛衣到髀  
渡罷官吏渡官軍三日水漿無一勺

趵突泉

濟南七十二泉之一

裂地出濫泉騰空湧一勺倒雨射青天海風吹不落源

從王屋來九幽閼緘鑰伏流忽出見笑爾水聲洶勢激  
有餘怒機暢廼甚樂飛出三白龍雲雷互擊搏引手掬  
而飲適口甘於酪冷然心胃間歷歷皆疏淪剛勁具真  
性貫河能自若臨流發深省自待詎能薄

濟南弔鐵忠襄公鉉

鐵板傷馬橋不拔燕王死地得生脫大書特書高皇帝  
孤城突兀變成鐵東昌之戰偕盛庸燕王陷入圍數重  
帝詔不許殺叔父跳盪走免攢鋒中參軍奇計險而詭  
宋參軍嘗說鉉乘虛襲取北平鐵公老謀在守死牽率北兵不敢南屏蔽  
江淮無踰此天心水面亭子上宴犒諸軍奮臂起節概  
仿佛張睢陽可惜當世無郭李背立廷中頭不回寸磔

餘屍煎作煤鐵梃夾持使北向油鑊沸蹙聲如雷左右  
內侍皆糜爛恨未飛濺周公旦生前忠義無貳心死後  
仇讐終不面君不見皮囊脫械犯輦塵猶有緋衣行刺  
人

將自濟南赴都冉金浦周蓮西兩縣令招同周鶴  
臯陳星卿孝廉明湖清集遂訪歷下諸勝得詩

四首

城外青山城裏湖春煙高下接平蕪題襟盡是南來客  
莫遣都官唱鷓鴣

海右亭臺湧碧波古來惟有少陵過溪毛再拜船頭薦  
一瓣心香昨日多

登臨從古易生愁，恰又忽忽下水樓。  
一曲琵琶一杯酒，好花爭上美人頭。

翩翩帆影漾斜暉，總覺銷魂不忍歸。  
撥棹鶯啼湖上樹，桺綿如雨打人衣。

河間

雲冷日華宮無人，致寓公朔天春有雪。  
瀛海晝多風屋瓦寒，沙外城笳夕照中。  
最憐饑饉後處處見飛鴻。

富庄驛和蜀女史鵲紅題壁原韻

忽忙鴻雁各鳴哀，我亦嘉陵避劫來。  
九十九峯烟雨外，朝朝回望陣雲開。

閩外將軍兩鬢絲，長征無復凱旋時。  
不知賊帳饒歌舞，

也是民間好女兒

人間險要劍門關賊騎如雲自往還血染江潮紅不褪  
秋來悞認落花斑

扼險雲安戍卒盈冠來鼙鼓早關情流民滿野無人繪  
愁煞書癡白面生

士女嘉陵各戒裝渡江猶有避兵箱誰知守險將軍在  
烽火西來更斷腸

寒更冷驛易銷魂落筆忽忽月已昏一樣流離呼伯叔  
墨花多化血花痕

出都

迢迢乘興至寂寂打包歸守命無窮達平心得是非生

年猶未壯知賞豈終稀一笑重低首緇塵滿素衣

天津道中雜咏

笛裏歌聲聽有無蕭蕭蘆荻水平鋪東南轉粟經年到  
十萬樓船小直沽

卅今城外草如煙采藥當時竟不還子女千人齊入海  
誰將大盜作眞仙

飄然去就一身輕不向人間買令名落日中條山遠近  
白雲何處訪陽城

海上崑然百尺臺也如銅雀重低徊袁家若肯懷兄弟  
魏武爭能射雉來

訪李白華於渤海不遇已而相值濟南道上

心知堂詩集卷三  
落拓風塵實可哀爲君惆悵上秦臺  
紆迴錯繆忽相值  
一笑故人千里來

重至濟南

兩度將身入畫圖濟南自古號名都  
三春草色長迷路  
五月蓮花香滿湖  
蹈海有人稱壯士  
譚天何事作狂夫  
青煙一瓣華不注  
覲面還能識我無

任城望太白酒樓作

謫仙仙去不重遊  
更有何人凭酒樓  
客意縱橫輕萬乘  
才名散落壓千秋  
春時憶女桃花笑  
異地懷人汶水愁  
記得天津橋上醉  
長歌還爲董糟邱

葉縣卽古昆陽漢光武戰王尋王邑處

壞雲晝隕星夜墮百萬雄師銳氣挫三十六家講兵法  
指揮尚謂城可破白水真人衣絳衣從十三騎去如飛  
募得三千人敢死轉戰遂前來破圍宛下兵到書一紙  
王尋王邑心不憚見大敵勇衝中堅城上人亦鼓噪起  
是時敵勢三百倍司徒授首司空敗大風雷雨助屠戮  
虎豹犀象皆驚潰渚水積屍高過堤逃死爭踏死人背  
可惜長人巨無霸不知身橫幾畝大牛背唱凱開中興  
背邛面洛都東京圖讖符合亦偶耳笑煞國師空易名  
望荊州城有作

章臺走馬柳邊過黯黯方城望若何地近中原風俗古  
天當外戶戰爭多騷壇屈宋餘香草霸業孫劉付逝波

八  
九十九洲煙雨裏虎牙何事日嵯峨

自荆門解舟口占

送我到荆門迎儂還錦里扁舟來去時都是故鄉水

兵書峽

仙人垂綠髮坐向綠雲端一卷書何有光芒萬古寒秋  
江拖素練斜日走金丸會有知兵者相從圯上看

峽口

朝日衆峯開孤舟擊櫂回灘聲穿石出江勢裂山來樹  
色秋中冷猿啼斷處哀何年垂釣叟長對白雲隈

扇子峽夜泊

一山開兩扇江水束如練斜月隔群峯玲瓏隙中見

重至夔門

灩澦當江峽勢開濃雲一點雪花堆舟穿石窟騰風上  
浪打崖響潑雨來引纜已知人力盡隔山猶假鼓聲催  
西行不得東歸險那待聞鶉淚滿腮

巴陽峽

九峯青圻處峽勢認巴陽撓水雲根熱侵天石氣涼瀑  
懸岑洞布花釀魯池香未及題名去風帆恰飽颺

上灘謠

蜀道之難難于上青天不是天梯雲棧巉岼複沓之高  
山乃是銀濤雪浪懸流陡絕之危灘山高類壁立猶得  
百步九折縈巖巒灘危若瀑布何由一葉逆泝凌飛湍

一灘如一山上山不如灘灘底更有山千盤灘底山爲  
人鮓甕灘上山爲鬼門關虎須魚腹指形似空舡折桅  
傳險艱帆檣騰風不得上那待灩澦大於象岸上水手  
船中人都將性命付百丈摩崖踏磧魚貫行鼓進鼓退  
如用兵腰環環今頭在股併力死與江神爭失勢百丈  
忽中斷顛踣多在崖之半跌不入水廻望船來船掉頭  
去如箭或落盤渦中漩水吸之漩漩急漩愈闊船頭倒  
插忽不見或入駭浪堆瀆水正鼓憤瀆高船亦高砰訇  
倏崩散拋撞石棱上裂作千片復萬片慘兮慄兮浮屍  
相屬烏啄人背鰓穴人腹杜鵑惻愴而叫血哀猿斷續  
以聲哭黃陵之神掩耳不忍聽牽牛返走牛轂觶摩天

羣峭學牛角山矗矗雲蓬蓬天一線灘千重崖壁斷江  
流通萬古險不爲我設我行過之自慌惕慌惕不爲灘  
水激教匪如風雨去來倏不測逃亡鋒鏑餘江干喚渡  
迫我亦思翦江縶路苦在北倘見游騎來斷纜任沈溺  
夔巫諸山多巉崎東川西川之藩籬何爲今無隘可守  
不比灘險如舊時我作上灘謠心悲語突兀安得便學  
嚴君平賣卜成都不復出臥游日對三峽圖夢逐江水  
來石窟

渝州雜咏

落拓遊人尚未還春來重上縉雲山相思寺裡相思竹  
不待皇英淚始斑

山城雉堞倚雲開四面江流滾滾來雨後春潮添一丈  
浪花高過養蠶堆

村煙漸上夕陽低點點歸鴉故故啼流水落花春不管  
行人魂斷海棠溪

欄前花影碧重重萬斛閒愁酒一鍾城外竹枝城裏和  
月明初上鐵旄峯

蕭蕭去馬雲中走葉葉來帆鏡裏收萬里歸程仍故我  
青山羞上御書樓

心知堂詩集卷四

成都汪仲洋少海

嘉州集

起癸亥二月迄甲子十月健爲作

初發江口

平生煙水癖夙夜夢江湖風浪今初試蛟龍識得無鉦鳴人作氣篙落水飛珠不覺揮毫寫滄江擊櫂圖

江口弔華陽伯楊展

嘉州壯士楊玉梁不奉西朝八大王手執義旂復郡縣  
僞職醜衆紛披猖維時獻賊空竊據人民屠盡更殺降  
降兵殺盡親兵散南面獨坐愁踞涼收召四路合餘孽  
尚有百萬身力强鞘載金銀裹珠寶決計東竄辭華陽

截江小隊忽相拒左翼右翼紛開張船頭壯士自搏戰  
長鎗大戟勇莫當前隊接仗破渠帥奇兵縱火攻中央  
賊船首尾不相顧江口偪仄難廻翔一船著火千船亂  
飛焰延燒風正狂全軍糜爛剩灰燼江水沸熱如羹湯  
豈無漏網偶登岸不死水火撻鋒鏑此輩克殘二十載  
假手壯士皆摧戕獻賊精銳一朝盡獨身跳免旋誅亡

盧賊自此遁入鹽亭爲  
本朝肅親王所誅

是役威名震益部忠義反正爭扶將收

納困窮致妬忌醉後被害千古傷袁武祖暴不足責總

制胡爲發悖狂

袁韜武大定以窮來奔展納之迫沅撫李乾德以總  
制臨蜀遂與袁武合謀害展未幾袁武投賊李赴水

死

白晝剽刃仇人腹壯士之子何堂堂

展于環新以難奔投  
本朝更名環投職

參將順治十六年 王師下嘉定袁韜爲亂軍  
所殺大定投誠十八年環路遇大定手刃之

彭山弔漢壯侯岑彭

浮橋門樓飛炬紅  
冒突露橈乘順風  
牛酒不受軍容整  
民心大悅誰撓鋒  
平曲破後井蛙懼  
厚集兵勢屯資中  
豈意攻取在不備  
廻船倍道趨嘉戎  
徑拔武陽至江口  
唾手成都收大功  
彭亡日暮營未徙  
被刺乃與來歙同  
謀國但解使刺客  
盜賊伎倆非英雄  
虜死城下占驗左  
洞胷墮馬何匆匆  
八公子系盡族滅  
縱兵大掠城市空  
漢帝誚讓大司馬  
遺民私祀征南公

眉州謁三蘇祠

文安居中尊無偶  
文忠在左文定右  
彷彿君家木假山  
三峯鼎立世未有  
韓公歐公皆工師  
遭逢良材不放手

奏書召試廼辭疾擺脫斧斤獨此叟兩學士是棟梁器  
文章節義相師友雷州瓊海棄檣散何曾大厦支陽九  
從古通儒無僞心豈有直道調衆口功名排擠在生前  
門戶修怨到身後譬彼蚍蜉蝣蝕松柏枝葉雖傷本根厚  
祠堂亦是兵火餘風榭蓮池似舊否臥牛城裏紗縠行  
墓頤山下玻璃酒欲效宋玉謔大招翳鳳騎鯨鯨認某某

泊嘉州望凌雲諸勝作歌

昨日走馬東川還屐底踏盡巴渝山長風萬里送秋水  
吹我今登載酒船岷江何委蛇澄秋白如練青衣沫水  
橫腰來并力擊之餘一線奔騰佛足爭朝東五色浪花  
空際戰蒼茫不見十三樓彌勒大像時隱見九峯起伏

如飛雲翠岫丹巖光四炫江心忽黑烏尤來一點濃煙  
浮不散造化功力何茫茫此中會有蛟螭藏須臾雷雨  
生石罅黑白咫尺迷陰陽半壁神奇殊可喜絕頂洞天  
可知矣人生快意良無多莫須有志徒爾爾泛我乘風  
槎納我飛空履左挹浮邱右洪崖崑崙滄海從此始

游凌雲登東坡讀書樓

竟作凌雲載酒遊不宜重下讀書樓青山可惜餘歸夢  
白首纔知不願侯絕頂芒鞋登井絡大江煙雨隔嘉州  
長風對面翻雲海掃出峨眉翠一鉤

遣僕

往返關河苦艱難爾我隨幽燕風雪夜灩澦馬牛時爲

有青衫淚添來白髮絲不堪樽酒賜驅汝暫相離

過荔支灣

好山無數似雲忙夾岸迎船落黛光兩槳綠醅春後水  
一灣紅豆雨中香有人病齒難圖痛何處懸釵入鬢芳  
我憶東坡老居士不宜翻愛嶺南鄉

憶昔行寄懷李白華

初名修來易名成  
蹊山東濱州人

憶昔同住裁眉釐我年二十君十六相逢頓似平生親  
相愛渾如眞骨肉有時春晴君未來我行芒屨走僕僕  
有時秋陰我未往君行駿馬馳鹿鹿花開花落芙蓉城  
咫尺天涯日相逐相逐終恨相違多移來風雨對床宿  
登高忽望嘉陵雲驪車在道酒初漉酒初漉人將離當

筵愁緒紛如絲嗟嗟千里循陔意送君南浦不敢更唱  
銷魂詞青青者柳折一枝落日欲沒西山西連翩上馬  
分風馳從此竹杖草堂無顏色空懷白也飄然詩采得  
梅花未驛寄風雪聲中扣門異相攜一笑天爲春頃刻  
百物含生意促坐不知殘夜寒高談各問平生志抽箭  
射潮潮退流揮戈指日日爲留人生稱意不多得舉杯  
酣飲百尺樓醉後渾忘身是我那知典盡千金裘狂歌  
未已壺欲碎君復隨侍南中游時以尊甫署西充令同去我聞雅風黎  
雨蔡蒙雪六月陰寒天似秋送君河梁慄不悅心隨旌  
旆搖悠悠悠悠一別無消息憶君尋君何由得但見峯  
迴路轉旋螺而上勢極天奇花怪石紛迷惑馬蹄纔踏

熨雲黃桂棹忽翻羌水黑一聲子規何處鳴落月屋梁  
心惻惻夢中人不見夢後境空憶春來鴻雁盡北飛競  
傳渡瀘人已歸斗酒攜迎紅豆浦蠻風瘴雨滿征衣遺  
我浣火之奇布照夜之明璣云出青海之西不毛地陸  
離光怪人間稀明年朝廷策官政量移雅有甘棠詠阿  
喬本是潘河陽陵陽轉挂虛堂鏡尊甫卸西充事後卽署仁壽令是時升  
堂拜後我欲言君行眉色如鴻軒謂我不須愁又別相  
將共讀秋樹根遂秣廐中馬遂澤車上轅行盡千巖與  
萬壑到眼塵市人聲喧跨鼇峯下結廬處窗前白雲出  
如絮飄蕭自得況神仙三百杯酒日爲數浮邱之袖洪  
厓肩一拍一挹忘朝暮星離雨散忽紛紛洞天欲住不

得住君挂蒲帆下峽回我騎驚馬出棧去棧路百折下  
青天縱橫南北馳幽燕花樣不投當時好鬚眉豪氣空  
依然羈羈返轡尋知我秦臺遠近窮雲煙突如何人倒  
屐出拉我直入花間室驚喜無端夢耶真泣然淚花已  
對溢澄澄注目忽相視都似從前不相識我言君近殊  
豐好君言我近何蕭瑟一是離鄉一還鄉况復華空新  
墮翼休休棄置且莫陳丈夫落拓須嶙峋且盡平原十  
日飲天涯聚首良當珍古厯亭外水天碧萬朶芙蓉繞  
前席秋風寥落悲人心尋君還作辭君客大河左右車  
輪摧長江下上風帆裂萬里橋東回首望一髮雲山影  
明滅青羊市碧雞坊百花潭中春水香踟躕瞻顧舊遊

處令我精魂飛越來君旁

題趙蘆洲刺史大雪從軍圖

代趙爲河南商邱人

鬼燐燒斷棧中路帶甲將軍不得度斜陽血戰刀光昏  
萬馬風馳鼓聲怒賊嘯忽爲星雨飛天陰月黑追何處  
參謀帷幄徵儒臣駕部司封無應人商邱先生投筆起  
甲兵十萬胸中鳴當殿請纓一再拜其氣已吞熒惑精  
國士之風固如此應知閒曹嘆拊髀庸庸未讀孫吳書  
交口危難紛不已辦賊如君真可人驅車徑渡潯沲水  
黃沙颯颯隨人行紅旗半捲歌西征離亭初進一杯酒  
雪花亂落寒無聲公行盤礴昂其首潑墨先教朔風吼  
元陰四匝霰光動人與真宰爭下手須臾百道寒氣生

化作同雲滿山走誰何  
弓節懸腰中連翩上馬西從戎  
汗血蒸騰毛上雪青驪幻作桃花紅  
圖裏之人圖外畫  
森然相向天無功  
從古將軍少風雅不謂名士能英雄  
但令拔幟成一隊應可談笑銷邊鋒  
君不見懸瓠城下  
三更雪平蔡歸來裴相公

鸚鵡詩寄內

翠衿疑染隴山嵐  
玉鎖金籠閉不堪  
槐落夜寒空憶別  
悔因紅豆到江南

眉山道中

長虹亘五色束斷青冥天  
雷聲轟未已錯雜雨如錢  
迴視雲堆墨沈沈  
落日邊返照穿其隙  
霞彩忽萬千我行

紀所見欲語心茫然光景不可待林梢生暮煙

和錢次軒夫子

名栻浙江仁和人

咏梅原韻

題詩東閣愛疎梅細雨輕寒何處開玉笛樓中吹不落  
梨花雲裏夢無埃銅瓶未假江南驛綈袂能迎小歲杯  
長憶去年官舍靜春風座上暗香來

客久夫子竣試渝州子適自都歸過因得進謁

題宋梅生夫子餉耕圖

名鳴琦江西奉新人圖有袁采堂明府朱參軍張少府諸人

柔桑深處鳩相語滿田濃綠足春雨良苗短短初懷新  
一握參差青萬縷嘉州太守行春時鳴騶緩踏來東菑  
臺笠顛倒欣跪拜畚鍤環繞驚威儀道旁掃石苔花落  
下馬列坐命耕作齊聲唱諾分畦町胼手胝足爭踴躍  
或持鐵犁鏟曠原白雲到處黃雲翻或挽筒車引澗水

墨龍下挾玉龍起紛紛秧馬馳於田衝開萬頃琉璃煙  
歌聲在口禾在手一栽一唱皆天然大婦提筐小婦簪  
縞衣翠袖殊娟娟采桑曲和牛背笛依士媚婦何纏綿  
虬髯叅軍紗帽側軒然起立請賜食少府衣袖旋翩躚  
指點頗分頗有則須臾太守喜顏紅樂民之樂如醉翁  
怡然側坐相向笑尤有當年臥雪公倏忽夕陽挂樹杪  
碧空如煙沒歸鳥生綃寫就餉耕圖傳與他人作官表  
十五夜望月答內

滿身花影不知寒又見當頭白玉盤莫怪欲眠還小立  
一年幾在故園看

卽事

二月下嘉州春江落棹柔慣爲南去客羨看北來舟旅  
食終無賴饑驅不自由凌雲時載酒聊可解煩憂

芙蓉

十里樓臺畫障中木蓮花繞蜀王宮能從木末畱春色  
不藉東風也自紅

嘉州道上望峩眉山

我不能如楚狂士歌鳳遁迹名山裏又不能如范石湖  
持節游山私著書五岳之外稱奇絕夢魂摹想到突兀  
今年作客來嘉州烏尤背上頻回頭似有精誠感眞宰  
飛空翠影出雲海大峩秀絕高過天頎頎不礙稱嬋娟  
二峩三峩如婢妾螺髻鴉鬟纔及肩但見一氣晴嵐湧

潑眼青黛自矜寵須臾拋出堯羅綿雲作羣腰半空擁  
此時山中正佛現日光雲光五色眩中有明鏡攝人影  
鬚眉毫髮面若面金橋渡海白象來上坐菩薩目如電  
歛然散去何所有巖岫林木餘葱蒨晴雷夜吼山潮來

山中每夜有風雷聲  
回回來謂之山潮

陰火宵燃聖燈見又聞龍門對峙如削

成上有懸流雙帶縈迴風瀑布濺飛雨垂空銀漢流天  
聲龍池清淺蜿蜒縮雷洞欬唾靈霞驚杪櫛花湧光明  
頂縱目憑虛吞八紘瓦屋之南挹溟海靈關以內招青  
城西域萬里通天竺綿延雪嶺寒崢嶸可憐江水只一  
線迴合斷續如有情其餘俯視皆平等微覺下界青冥  
冥我無列子御風之飈車又無莊周搏雲之鳥翮垂涎

欲食綏山桃登山未著謝公屐八十四盤香不辨飛煙  
下射眸子碧江干擬趁月半輪往踏山頭雪千尺

凌霄

長藤婀娜紫霞驕綠葉如煙總不消日暮園林風過處  
異香搖落下層霄

合歡

朝開暮合小窗西也似鴛鴦不獨栖殘月曉風香夢散  
有情應怨汝南雞

徐西園刺史邀同諸人龍池春餞有作

天光雲影澹如秋十二闌干亞客愁曲水流觴行樂地  
海棠香國小諸侯花時細雨成春餞燭焰微風卜夜遊

我比東坡生更晚懶尋王氏舊書樓

背郭鱸堂畫裏居不須更羨武陵漁懷人意緒隨春老  
載酒時遊得月初共惜風光喧笑語渾忘露氣滿衣裾  
池塘活水豚巖近也有烏頭別樣魚

過汧魚子

青天白日雷轟鳴上游十里聞灘聲客心惴惴目相顧  
輕舟待與江神爭灘聲漸近流漸急過窗雲樹紛不一  
船頭忽高船尾低一江狂浪作山立馮夷擊鼓湘靈愁  
貝宮飛出水晶毬圓光一閃打懷落散作千珠跳不休  
篙師柁工皆色變萬棹死與蛟龍戰浮沈旋轉良有時  
倏然而東知得間

題宋杏坊畫照

名宴春江  
西奉新人

卷中湖水明如玉  
菡萏花開香正熟  
斜陽欲下好風吹  
一株楊柳颭空綠  
畫舫欸乃從中來  
花花葉葉紛爲開  
一兒持紈扇  
一兒捧玉杯  
一兒無所事  
折花笑入懷  
人影波光相映走  
兀坐先生欣拍手  
酒時無花酒當花花  
時無酒花亦酒花  
中飲酒如飲花  
花香隨酒落人口  
酒後看花花更多  
紅雲萬朵醉顏酡  
一棹忽驚鴛鴦夢  
扣舷齊唱采蓮歌  
平生快意有如此  
太乙乘舟只偶爾  
靈光閃爍年復年  
花中坐飲人未起  
薜荔衣芙蓉裳  
三峯天外遙相望  
我欲乘風遊玉井  
十丈蓮花作醉鄉

贈徐光庭胡亦彭

徐北通州人  
胡山陰人

萬里猶然燕市月三年未聽浙江潮  
青天蜀道同回首不看我眉雪滿腰

榮州早發

不道披嵐翠猶疑露滿身宿雲堆似雪  
遠樹立如人軋軋知烏起淙淙識水濱  
峯迴天忽異平野巖煙新

送別沈省園少府

名世煜浙江山陰人

去年落花時我始迎君來今年花開後  
我復送君回聚散春風中何由騁此懷  
君爲我傾壺我爲君折柳但願長相思  
不輟久離後無勞乍別時煩君屢回首

贈張大又韓

名銳湖北江夏人

我家青羊市君家黃鶴樓君家門外水  
先從我家流流

水無時已中有一雙鯉秋風卷白雲聽我歌終始我年  
十四五君行入峽來絃歌初受業戎馬正多才往往隣  
居處識面猶無媒落日玉山倒春風花徑開令弟暨賢  
嗣忽邀詩酒陪詩酒歡無涯兩兩傾懷抱繼知馬氏賢  
白眉尤屬好尋君苦相左知君恨不早誰知十年後始  
遇武陽道我我古人貌溫溫君子心愛友多直言規我  
情尤深一時不得見鹿鹿相追尋易地籌身世傾懷各  
有真遂令僮僕輩亦皆形影親屈指今年冬勢將不相  
守峽門擊櫂歸棧道連雲走離別亦何常後會應茫茫  
人生重意氣但在長毋忘且共巴山雨一舉累十觴丈  
夫須自立雲漢永相望

七夕

滿庭花霧撲簾鉤  
銀漢無聲水自流  
乞巧人多儂乞拙  
願逢離別不知愁

題沈天孫畫照

君家本若耶  
繞屋盡蓮花  
底事辭鄉國  
翻來客漢嘉  
湖山餘夜夢  
風雪感年華  
應坐如船藕  
浮歸看浣紗

心知堂詩稿卷五

成都汪仲洋少海

出棧集上

起甲子十一月迄十二月道上作

初發華陽

玉壘峰高雪壓天  
我行重著祖生鞭  
題橋豈必誇今日  
賣賦何因比昔賢  
廣漢衣塵似雨華  
陽回首樹如煙  
雲山萬疊詩千里  
指點長安在日邊

駟馬橋昔年與馬易之別處

昔日赴長安  
臨歧酌我酒  
今日赴長安  
不復執君手  
生者勞未休  
死者嗟已久  
悲風淒以動  
吹折舊楊柳

楊升菴先生墓

連蜷雙桂幾經秋故國猶傳正首邱賈誼有才餘慟哭  
屈平無地著離憂淋漓血肉金門杖冷落丹鉛瘴海樓  
空使九原聞赦詔泰陵風雨阻中州

姜士遊故里

地名沈鄉里

突地淳甘泉泉中躍雙鯉春暉無恙草心喜至今斷碣  
埋荒煙父老尙說沈鄉里嗟我早懷風樹悲到此踟躕  
淚無已

龐靖侯墓

漢上推佳士軍謀亞武侯偶因天下事不作鹿門遊舉  
酒陳三計揮戈闢益州蕭蕭松檟裏馬鬣已千秋

雞鳴橋

雞鳴橋上一聲雞滿地寒煙月墮西安得盡煩公遠祝  
金雞都不夜中啼

抵綿州

青山千疊繞綿州匹馬平沙古渡頭一桁紅雲秋遠近  
芙蓉溪上越王樓

魏城驛用羅江東韻

揖別鄉園作遠遊芒鞋布襪一身秋當關馬踏雲中驛  
隔岸人登畫裏樓山勢天包從北轉水聲風捲向西流  
離愁別恨知多少不望綿州望益州

入棧

試險初乘興人如叱馭豪平林斜日遠匹馬亂峰高古

洞風悲嘯寒溪水怒號行歌聊自慰嵐翠滿征袍

七曲山

看山山欲高游山山欲曲紆迴殊不知步步上空綠却  
顧所來徑何處初著足參差峰勢離錯折嶺相續造化  
鑪冶奇搏雲成結束隱然應六星卓哉出五嶽念我非  
姚萇如意不能握徘徊石盤陀天風聲謾謾

武連驛用陸放翁韻

蜀道前期又後期文章得失總難知三秋客思連雲棧  
萬里鄉愁兩鬢絲殘照滿衣歸店早亂山圍夢到家遲  
雞聲未唱人爭起可似金門射策時

劍南古柏行

蜀材輪囷備世用參天拔地皆梁棟江漢清流灌溉長

岷峨奇氣本根重歷代鍾毓如鄧林別幹分枝難悉誦

專榮最著東西漢繁蔚競傳南北宋生機掃地成劫灰

崇禎年間有餘慟黃面黑心張獻忠

獻賊爲本朝肅親王所戮剖其心黑而方云

嗜殺自古無人同跳盪橫刀恣屠戮東川西川人煙空

碑板鏟字快椎鑿神佛墮淚愁傾鎔

獻賊所過凡碑版之有年號者鏟去神佛之石

像者斷胆銅像者傾鎔之諸像有先期墮淚者

狠怒狂暴到金石豈有喬木逃宛鋒

憶從柏灌嗣帝業栽培萌蘖開鴻濛武鄉桑園文憲桂

綏山桃樹靈巖松杜老甘林西瀼畔白傅柳枝東澗中

霜冷雲安橘官綠暑熱涪州荔子紅橙木千章竹萬个

緣江背郭圍芙蓉兵火所過更何見赤地兀兀山童童

如何獨宥劍南柏一路扶疏連梓潼西朝太祖有湯沐

翦伐不到神之功

獻賊曾封梓潼神爲太祖高皇帝

迴翔映日下鸞鳳天矯

出海騰蛟龍修鱗奮怒排大翮併作一氣雲濛濛翠影不斷三百里先輩典型只剩此樹人樹木將毋同請問

劍州李刺史

柏爲前明正德中刺史李璧所植

### 出劍門

連山西南來有如萬馬奔又如千頃濤一氣瀉中原五嶽走相讓壓斷江河源上帝呼巨靈舉掌排雲根其勢不可遏壁立飛上天鋒鋌各呈露排列何森然逼刺漏天破高撐銀河穿萬古逗秋雨蜀坂聲綿綿而我騎驢至欲出愁無門迤左堵女牆迤右拖崇垣崕岬裂一隙

鑿破東西川突有偃月峰彌縫相鈎連偏仄一身過陰  
森白晝昏時恐兩山合難招石中魂閣上風鈴語關前  
秋戍屯陡下五千級決皆空風煙對面如屏障惟有小  
劍山拊膺試回首細路餘盤盤日氣穿峰墮翠影摩雲  
寒壯哉形勝地割據凡幾人上邇公孫述下逮明玉珍  
坐井以自大接踵揚降旛恃險竟何濟安邊良獨難

### 小劍山

只疑雲欲飛不知山勢峭瀟洒出清挺孤立更娟妙銀  
漢淬寒鋒銳利不可鞘劃破漏天漏媧皇補不到絕壑  
凝元陰萬古雪如縞自從天地開日月光未照山鬼與  
木客隱隱雜啼笑安得壁上行絕頂訪祠廟

山頂有武  
侯祠宇

牛頭山

言上牛頭山山勢俯尻脊攀陟如登梯詰曲千百尺不知所歷高雲氣生兩腋絕頂開危樓山僧慰行役小憩臨軒窗縱目動魂魄茫然失天地上下皆青碧低頭不敢仰恐觸五色石欲問嘉陵江煙中一痕白

桔柏渡

夙聞桔柏江今過桔柏渡水落不容篙蕭蕭秋滿樹低徊想陳迹直與古人晤道重葛仙翁孝欽廉叔度亦有何易于署笏長官怒當時偶然事千載有餘慕落拓役微名此行本已誤願言將我心一爲濯寒素

皇澤寺望武后比邱尼石像

女媧雖稱氏竹書虞浩汗呂雉雖臨朝未敢改爰漢自  
古牝雞晨無如武嬰亂居然南面尊不肯垂簾慢毒手  
逞奇心雄才肆淫篡始生傳此地望氣有人嘆混跡緣  
感業託佛更驕悍詭號謂金輪鑿像大江岸偏袒露袈  
裟兜羅手垂髻千年波浪餘瓔珞尚明爛得毋妖氣憑  
不隨雲雨散吁嗟懷五龍當時撼大難

飛仙閣

關門雲外開天梯十萬丈我欲問仙人如何頓飛上化  
鶴不歸來後人但想像石壁餘紅霞高擎巨靈掌好花  
不知名彩錯緣厓長峽口生寒濤江流多跌蕩惟應羊  
模谷仙隣各憑仗

千佛巖

誰撮恒河沙幻成千萬身紛然天外至雲立空江濱石  
髮雨中亂苔衣風後皺圓光日隱見五色騰迷津欲問  
無生力慈航拯幾人惟傳韋刺史斧鑿能通神豈不識  
荒誕婆心緣愛民從知摩崖跡一一甘棠春我願將斯  
意廣爲循吏陳徘徊更瞻眺上馬辭嶙峋

朝天關

上山如上灘肩輿學舟簸作勢升層梯不復得平安僕  
夫汗交流旅客心欲墮一步一聲上直到雲中坐回頭  
駭來途慰勞相爾我時清罷邊戍開城餘粉堞縱然行  
路難幸無盤詰瑣古來形勝地南北爭關鎖惆悵復如

何秋風吹劫火

嘉陵道中

數疊秋山青欲合一江流水碧無聲分明身在嘉陵道  
卻似吳生畫裏行

捫參歷井上嶙峋屐齒雙雙日苦辛九十九峰江上路  
低頭羨殺放舟人

秋風如掃夕陽開旅客懷鄉首重回不道嘉陵三百里  
好峰時爲破愁來

層層雲樹湧青山到眼眞忘蜀道難我自記詩人記畫  
俱無粉本赴長安

龍洞背

潛水所經

怪底雲滿衣行人在龍背縱馬蹴石鱗四蹄電光碎時  
恐眠龍醒翻身落雲外銀漢從天來一瀉如縞帶蜿蜒  
蟠其衝勢欲障使退萬箭森濤頭怒水轟不耐得竅貫  
龍腰雷霆走腹內繞腸奔尾間泄想飛泉大偉哉神禹  
功疏鑿此爲最西由晉壽至東與嘉陵會中間穿長竇  
潛湍竟無礙扁舟倘可入曲折窮幽怪

七盤關

川陝分界

隘地從誰闢雄關自古聞門開天上戍路接隴頭雲兩  
水廻環合千山向背分憑高尋戰壘昨日靖妖氛

寧羌州道中

炊煙寥落客心驚百戰瘡痍尚未平滿岫白雲飛去後

人家指點避兵城

一篙寒綠渡平津黯黯孤城地入秦殘雪半山消不得  
都如明鏡照行人

芒鞋踏破亂雲堆只似遊仙夢未回盡日隴頭逢驛使  
梅花何處寄春來

嶓冢山見漢水發源處

我昔浮襄陽連天皆秋水帆影如飛雲出沒浪花裏及  
茲嶓冢遊尋源數千里山腹噴寒泉不盈一掬耳河從  
荷精發江亦濫觴始由來世間事都自毫末起壯志嗟  
吾曹頭顱尚如此凌海問蓬萊何時騎赤鯉

滴水巖

一徑多幽篁輕煙濕峭阪人行蒼翠中颯颯秋意遠忽  
聞風雨聲掉頭驚睇眄誰傾萬斛珠錯落岡頭轉破壁  
流涓涓穿雲滴激激百尺水晶簾空明垂不捲巉巖懸  
鏡中石髮如絲軟惜未爰蒸時來茲松下飯安得愚公  
移不用并州翦

五丁峽

漾水所經

我家上清峯來從青天上手捫參井光四顧神何王  
訥然開劍門羣山綠如浪十日披煙嵐所至意皆當打頭  
橫絕厓忽與行人抗引領千仞高不辨峯背向捲地生  
潮聲滔滔水名漾策馬隨飛湍始見峽門壯硤厓裂蒼  
玉一隙露開放螺旋而蟻穿怪石相偎傍就下稍寬平

江流不肯讓摩空揚巨刃五丁殊奇剏想當開鑿時風  
雷爭簸盪美女顏妖嬈金牛氣悽愴試問商周前飛越  
更何狀

諸葛忠武侯墓

草廬三顧許驅馳百代推爲帝者師學繼孔顏知大德  
才方伊呂惜非時生能伐賊功偏靳死不還都志可悲  
斜日沔陽墳四尺陣雲長護古松枝

自沔縣至褒城道中

輶車盡日走間關望遠裁眉夢不還一握煙鬟輕墮地  
捲簾欣見女郎山

黃沙驛裏一枝梅漠漠寒雲凍不開爲問畱仙橋下水

八女生言卷之三  
可曾風雨鶴歸來

百尺孤城落日寒長風捲地雪闌干韓侯略定三秦後  
更有何人上將壇

雞頭關

前日辭南棧昨日走平浦茲復凌高岡倍有登陟苦攜  
手成魚貫牽衣學猿舉細路不盈尺怪石相撐拄對面  
有人來一穴鬪兩鼠盤空摩絳幘足下雲如乳雷響歛  
奔騰變作迎頭雨草木搖天風蕭蕭雞振羽倘其昂首  
鳴誰當長袖舞攀躋誠已難陡下勢猶阻絕壑沈蒼煙  
七盤紆可數兩手持懸綆耳目皆無主十步移一梯臨  
踏復延佇有若灘上船稍縱不知所直從朝日升磨旋

到亭午軒然落平曠環環腰尚僂不敢回頭看拊膺息  
如縷

觀音碣

甕裏嵌天光四圍是積鐵我從壁上行盤空數十折嵯  
岬千丈峰突如雲出穴猿猱失攀援鷹隼愁飛越堂堂  
賈中丞手持天上節縱火燒砵厓橫腰鑿一缺怪石當  
人頭補天懸破裂頰霞飛不去丹嶂捫猶熱飛瀑濺石  
梁浪花凍成雪流爲百丈潭無風自澄徹山迴人亦轉  
劃然風景別歲晚行路難吁嗟心兀兀

畫眉關

巉巖峭壁石斑斑詰曲羊腸挂一彎殘月已過叉手鋪

曉煙初上畫眉關窮愁逐客如流水好夢還家隔亂山  
寄語隴頭西去鳥爲言人在翠微間

留侯辟穀處

無雙才識一人全詭託神仙莫更論林下赤松原不老  
橋邊黃石也能言還山略帶英雄氣入世先知禍福門  
可惜淮陰未聞道弓藏鳥盡漫呼冤

報漢心原似報韓天教多病不持權同雲已免真龍忌  
辟穀翻承野雉憐燒棧三秦歸掌握還朝四皓侍班聯  
無須更問飛身法事蹟當年半近仙

心紅峽

白日隨人行掉頭時復見入峽忽相別惟露天一綫雨

厓欹欲合石壁多怪變十幅翡翠屏百尺芙蓉劍蒼玉  
剖皴皴白雲逗崩散光明標頽霞皎潔凝素練奇鬼怒  
將奔美人春欲倦設色紛天然應是女媧鍊上有諸峯  
高離離時隱見水花亂開落瀑流爭絕澗洞口秋猿啼  
枝頭暮鳥怨何當椎鑿寬往來秦蜀便

### 鳳嶺

南棧跨龍洞北棧凌鳳州修坂撒鳳尾高岡昂鳳頭翠  
嶂銜鳳珠丹穴開鳳眸鳳鳥不復至聲寂三千秋餘此  
好山色褒斜無與儔秦雉蜀杜宇劃土鳴鈎斬豈不矜  
觜爪見此俱含羞新莽如驚鴟隋煬如鴈鷗羽儀亦偶  
託仁暴不相侔離奇更變亂牝朝唐改周鸚鵡肆殘啄

黃臺瓜不畱文王倘在上隱爲後世憂岐南最高峻況  
有山上樓去天只一握誰言尺五修德輝覽千仞願下  
虞廷游

夜抵黃牛鋪度歲

今年夜半終行人行未已明年夜半來行人行又起春  
風吹不到一片亂山裏

益門鎮

失喜羣山盡崎嶇昨日勞眼前秦塞濶頭上蜀天高古  
堠通征騎雄關亞百牢時清無內外不帶赫連刀  
送險首重回飛雲一萬堆路從天上落人自石中來叱  
馭懷前事聞雞想霸才數聲輕喚渡渭北夕陽開

心知堂詩稿卷六

成都汪仲洋少海

出棧集下

起甲子十二月迄  
乙丑正月道中作

宿岐山

莽莽黃沙外孤城落照昏  
民風多板屋廟祀肅姜嫄  
信宿人千里消寒酒一樽  
欲尋鳴鳳處衰草滿周原

武功雜咏

旃毛雪窖性情真  
五字河梁格調新  
脫盡節旄還贈別  
從來風義屬詩人  
鼓琴吹笛坐高堂  
一代通儒學老莊  
鄧隲雖亡梁冀在  
平生絳帳出椒房

叔將夫壻喚佳人悔過何須爲織文得婦艷稱蘇蕙子  
解詩誰似竇將軍

唐宗故宅屢開筵昔樹今花句欲仙不向風雲思壯士  
人傳褒鄂在凌煙

對山救我聲猶在更有何人救對山不學王維討官做  
琵琶風調自珊珊

### 班家臺

老父識王命一家堂構開邊功探虎穴史筆著蘭臺草  
檄北庭去封侯西域回居然增志表女子亦雄才

### 伏波村

受讀齊詩義早通不將章句悞良工生稱國士慙朱勃

死嘆神人惜呂种畫虎誠言家學在明珠蜚語賈胡同  
據鞍忘却少游語矍鑠漢廷嗟是翁

說客遨遊二帝間擇君能復五銖錢平生策畫堆山米  
畢世功名墮水鳶虜懾先聲空上谷蠻爭險道滯炎天  
雲臺却被椒房誤孤負沙場裏革還

登西嶽廟萬壽閣望嶽作

一朵蓮花一朵煙三峯空翠湧娟娟嘶風石馬秋窺野  
帶雨茅龍晝上天白帝西臨何處盡黃河東去幾時還  
高樓正對雲臺觀蠟屐思登萬仞巔

五嶽分方鎮兩間此山西去更無山仙人掌上金天迥  
箭括門中玉女閒日落河聲來積石雞鳴海色度函關

蒼茫拄杖秋風裏欲向鴟夷問駐顏

郭汾陽王故里

北掃胡塵西吐番倉皇受命輒回天平生至性基奇福  
萬死殊勲享大年侈過桓文餘器量誠通蠻貊卽機權  
誰知廿四中書考不在班書百一篇

史稱李光弼  
能讀漢書

潼關道中

枝頭宿鳥夢初闌馬上征人不肯閒半夜煙雲過華嶽  
平明風雪出潼關那無膽畧請纓去可有功名捫蝨間  
京洛不遙鄉國遠幾回低首撫刀環

潼關弔孫尚書傳廷

劍門旁徑名來蘇潼關要隘在禁谷

一名禁坑又名禁  
溝在關南三十里險地

漏罅誰彌縫黃巢既過李闖續揭竿初屬高迎祥黑水  
之戰何披猖渠魁生致衆殲盡可惜獨眼逃鋒鏑潼原  
合勢蹙餘孽重重獵射圍天狼紛拏跳兔十八騎游魂  
竄伏號金創是時陝撫孫伯雅邊才籌略真堂堂羣賊  
破散如風雨河南惟剩左金王總理東擊我西擊廓清  
計日銷欖槍縱賊偏遇熊文燦誤國正逢楊嗣昌機會  
蹉跎事勢變大計不得陳清燕思歸傲吏詠新詩嗾黨  
奸人修舊怨奇冤待決未行刑急難迴心忽召見項城  
旣歿傅昆明襄城又失汪歲星兩大敗後再持節山河  
破碎民彫零甫議屯田值荒旱創製火車抽壯丁縉紳  
憤怨昧遠慮朝廷諂讓催專征毓峒抗疏邱瑜諫倉卒

自欲隳長城項背相望使者逼風雨不斷從軍行七省  
督師何所統除却降賊是新兵徒以忠義相感激唐縣  
寶豐相繼平擊斷賊纛執之舞軍前幾獲李自成天不  
祚明乃宥賊連旬雨甚戰不得還師未肯遠迎糧破郊  
誰知虛就食萬幕沈竈斷炊煙諸將相看盡菜色壓壘  
致寇由輸款量沙作米詎誤敵饑驅那得整軍退枵腹  
猶能返旆擊餘勇推倒三堵牆陣後驚呼忽敗北跳身  
泥淖渡河走依稀又似柿園役欲守西安但守關如何  
間道忘南山腹背夾擊自奔潰豈必纛旗來賺門橫刀  
大呼歿賊陣馬革裹屍何日還從死或言楊大令

紀事本末言公

退屯渭南而死知縣楊  
賄彼執不屈亦死之

徇難不獨喬叅軍

鐵門題壁

道出崤函一綫賒昏昏雲樹接平沙中原地讓黃河濶  
萬里天連白日斜買就壺漿如得歲到來村店似還家  
誰憐夜半當頭月不待聞雞又上車

洛陽懷古

東都橫據陝之東百二重關半此中試看秦師違蹇叔  
纔知周制要姬公霸圖每苦崤陵塞王者惟言貢道同  
伊洛澗瀍依舊在明堂何處配維嵩

紛紛耳食咎東遷敗局猶支五百年拒楚尚能畱九鼎  
畏秦何事獻三川萑宏化碧空傳異柱史騎牛竟不還  
地險無餘天命改孱王孤坐翟泉邊

威儀重見漢旗旌白水真人厭用兵不屈嚴光培氣節  
褒封卓茂致昇平傳家大度符高祖突地中興住洛城  
却爲班張添藻采東都賦罷賦東京

當塗未代漢先衰厄劫重從十世推國戚勢微鈎黨起  
中官數盡外兵來移都豈爲石苞識受禪何須諸葛才  
頗怪爰劉廿四帝青蛇收運白蛇開

不諡文皇諡武皇千秋篡漢付先王全收璽綬辭疑塚  
別啟宮庭赴洛陽混一無才天慙險猜嫌太過豆其傷  
平生典論誇奇作火布西來貢上方

青頭雞謎聽難真詠到潛龍倍愴神志在少康圖舊物  
迹同衰魯鬪強臣探懷出版今何日犯蹕抽戈大有人

差勝南郊尋故事山陽接踵又虞賓

三馬同槽典午興羊車天子愧桓靈儲宮聖質如淳古  
佐命蒼生有審罄尊榮鱸魚人欲去銅駝荆棘嘆誰聽  
司空博物渾無用不省中台夜望星

初緣悍婦築金墉忽爲奇勲念若翁骨肉驅除由賈郭  
防維壞盡引淵聰入王構難散河上五部乘虛屯洛中  
慨息青衣行酒日柘弓銀研語恩恩

禁除北語出平城僞伐南朝駐洛京并廩餘生同帝舜  
遷移大計類盤庚臨江數罪軍容整下筆爲文典冊成  
經緯燦然殊不愧當年治譜在均誠

祁連池畔聽簫箏鐵騎如雲下晉陽樂行迴波爭踴地

舞翻敕勒逼名王河橋渺渺沈靈后卜像匆匆立孝莊  
遍索禪文誰應諾千牛刀上血花涼

月下常歌清夜曲洛陽虛築顯仁宮龍旂撻伐三邊倦  
水殿嬉游萬里通滿貯厥倉資李密遙分義旅屬唐公  
關西裔派餘疑竇不引蛇鱸祀祖功

骨醉餘魂崇有無生天彌勒徙神都龍燄轉復周家社  
燕啄猶畱漢代孤幸藉舊臣扶羽翼驚聞二豎斫頭顱  
如何一樣房中曲譜入桑韋調更殊

元元皇帝廟榛蕪漫道陪京佳氣無絃管傷心王給事  
旌旗變色李司徒中興功業資讒口三等科條赦病夫  
記否翠華巡幸日銅駝街上立天樞

銀撾畫地閉垂旒鐵騎勤王發汴州但怨宇文爭拓跋  
誰招董卓劫陳畱深宮酒態還如昨繞柱刀光未肯休  
凍雀原知生處樂可憐羅網誤輕投

揭竿初起屬黃巢篡取西京著赭袍有子還如安慶緒  
其人本似董臨洮纔聞伯氏投瓊罵又見昭宗繞柱刀  
應是然燈能乞福焚尸未得掘腥臊

墨經從軍本晉風錦囊盛矢起河東生來將種才無敵  
命扼伶官氣不雄樂器殉身真解脫酪漿療渴太朦朧  
金錢祝髮難逃劫姹女應慚數未工

十載車書不改唐無私大度夜焚香誰知魏縣廻征旆  
已爲陳橋作濫觴除惡應慚安重誨辭官頗怪范延光

潢池盜弄更番異畢竟從珂本姓王

洛陽陳跡足低徊元祐纔過紹聖來  
獨樂園中棋局變天津橋上杜鵑哀  
通天理數推皇極蓋世功名署黨魁  
剩有劫灰春色在年年依舊牡丹開

孟津渡河

誰將銀漢瀉崑崙九曲風濤漸不渾  
龍馬千年開北戒乾坤一綫劃中原  
當時白壁沈秋水隔岸青山近孟門  
便欲乘槎天上去支機摩訪舊題痕

清花鎮

田疇如掌水平鋪遠望春山淡欲無  
十里竹煙青不斷錯疑歸夢到成都

大風至衛輝

萬里風揚塵黃雲昏一片隔手視御人聞聲不相見捲  
地忽倒吹散爲羊角旋白日篩其上影黑如龍戰小憇  
沽村醪藉慰行人倦彼此更相笑鬚眉倏怪變綠竹何  
猗猗淇水淨於練再濯臨清流還我本來面

淇縣

列國諸侯學誰如衛武公至今難斷酒懷古欲歌風瓠  
子寒沙外蘇門冷翠中回頭淇上竹驅馬惜匆匆

旅夜

河轉月初斜燈寒夜有花鄉愁常伴酒客夢不離家水  
認星橋穩山迷棧道遮渾忘身是我醉臥在天涯

湯陰岳忠武王廟

君相競偏安先摧大將壇  
但言擒虎易誰念撼山難  
朔馬刀頭熱南枝海上寒  
可憐華表鶴鄉里不重看

沙河道中

馳車沙上行朔漠莽千里  
歷亂踏黃雲馬蹄騰不起  
微聞促促聲有苦濟秋水  
遲重雖移時穩平略可喜  
衰柳挂斜陽歸鳥暮煙裏  
三兩見人家信宿亦如此

保定道中寄懷家兄載菴

風塵迢遞近神京  
剩有新詩半篋輕  
春柳兩行斜繞路  
好山無數不知名  
鄉園掉首遙千里  
骨肉關心共一生  
馬上離愁消未得  
低吟時作鷓鴣聲

楊忠愍公故里

椒山自有蚪蛇膽不作青詞慣攀檻仇鸞死後頻遷擢  
狄道歸來更勇敢十罪五奸劾賊嵩齋戒三日見誠感  
下筆所至風雷奮削藁欲上鬼神慘豈無泣諫引牛衣  
不肯包荒恕藍臉真宗方嫌儲貳偏欽若正挾天書詔  
召問二王觸忌諱疏附張經竟決斬當其廷杖囊三木  
都人見者淚相掩獄中夜半氣稍甦割腐截筋心自憺  
瑣屑家事貽後人迢遞門牆告無忝公于獄中寄鄭端簡公書猶存海鹽鄭氏丹  
心浩氣臨刑詩從容不負七星巖誰嘉鳴鳳救直臣但  
譬養虎怵奸險可憐伏闕代死疏不得覆盆邀末減白  
溝祠宇額旌忠忠魂宛在靈旗閃九原濟濟多故人夏

言沈鍊笑相領夢裏射倒培壘樓西市依然頸血染

心知堂詩稿卷七

成都汪仲洋少海

燕臺集

起乙丑四月迄十二月京師作

與唐子范同年夜話卽以誌別

名張祿  
綿竹人

落日長安相對愁風塵慘澹黑貂裘空歸竟復如蘇季  
好遇都難似馬周萬里關心曾望月三年分手未登樓  
同聲莫作窮途哭且趁殘宵醉一甌

與潘石甫漫話有感

名志華  
揚州人

金龜換得酒千鍾五嶽崢嶸挂滿胷天下儘能猜腐鼠  
古來誰解好真龍書生負氣終成困食客依人要容  
萬事不如歸去樂繞城秋水看芙蓉

過朱竹垞先生藤花書屋

望古茫茫百感隨翻然失笑我爲誰  
人生若夢餘陳迹世事如棋又一時  
山石斷連雲氣活藤陰疎密月華知  
淒涼載酒尋揚子鳥語蟲聲答問奇

寄李白華

握手當時雨未婚爲緣歸娶別齊門  
輕心歲月隨行篋瞥眼風花失鼓盆  
不哭漸能成達化放歌纔解是銷魂  
天涯惠子如相弔落葉蕭蕭滿漆園

素衣空復染緇塵萬里疲勞七尺身  
下第劉蕡難負氣窮途阮籍易傷神  
行多悔吝思來日力忍饑寒念故人  
縮地無方枉惆悵明湖煙水望中新

九日偶成

闌干十二倚周遭，冷暖重陽只絮袍。  
怕見青山思故國，縱無風雨不登高。

閉門人臥亂書堆，未有茱萸酒一杯。  
無數菊花黃欲笑，遊仙夢裏看秋回。

王春波

名霖江寧人

爲亡室朱氏繪遺照船山侍御題名

綠莊嚴清影感賦一律

秋風涼月易銷魂，淚濕青衫不鼓盆。  
韻太清寒花有劫，圖緣哀怨墨無痕。  
從教沒世隨行篋，也當他生聚故園。  
割肉東方前日志，那堪回首更重論。

劉芳臯比部招同蔡琨厓舍人謝如山鄒龍田明

經黃友彬孝廉集飲次日寄謝

十載秋曹未了貧無多清俸慣留賓開樽尚是重陽酒  
把袂都逢故里人霜後菊花添氣韻雨餘明月倍精神  
連朝莫怪詩筒速爲趁輕寒手不龜

感懷

好詩無故上心來也似閒愁撥不開廣廈庇人原有志  
綈袍加我亦須才蒲帆十尺懷羅隱駿骨千金愧郭隗  
歸去更難畱未易茫茫四海自低徊

重至潞河

飛雅無數逐雲回滾滾車塵石道開樹色低圍城不見  
軒然塔影破空來

送別李敬亭少府之趙州

二十八星岡連綿趙郡傍雪中車軌黑沙上馬蹄黃路  
較還家近心隨落葉忙漢臺高百尺回首定相望

送別李熙堂年丈

昨歲多風雨相攜出劍門依人原有骨卽事漫銷魂挫  
折才因老流離氣不軒萍蹤如此幻何日共持樽  
磊落看雲客蕭條折柳詩一年游子伴千里故鄉思失  
意神逾王承恩事轉疑平原眞愛士去去復奚辭  
客裏皆貧賤通財意有餘對牀愁夢鹿彈鋏慨歌魚  
後交情密年來世路疎念茲千里別杯酒各欷歔  
別是銷魂事他鄉意倍深升沈難假手聚散苦關心懶

學鷓鴣搶羞同蟋蟀吟臨歧三太息努力結知音

悼亡

半月絲蘿唱懊儂犢車從此送行蹤初嘗別味青衫緩  
欲問歸期粉淚重貧女嫁遲成成婦諸生謀拙似流庸  
無聊記指嘉陽路夢覓凌雲第幾峰

初婚半月卽應聘之健爲

高齋漫憶定情詩懶惰無心待問奇消夏暫停升座講  
納涼偷得到家時天長駐馬爭新月路近趨程背早曦  
識面未眞頻注目可憐羞不說相思

六月自健爲歸

蕭然襆被竟空歸燕婉無多百事違天曉券書忙乞米  
夜寒刀尺待成衣雄心慰我貧非病曲喻言人瘦可肥  
手種芙蓉花滿樹西風吹似落霞飛

青山四面繞平蕪小縣樓臺入畫圖千里水雲歸思濶  
滿天風露客星孤非關大監常嗔婦漫道羅敷自有夫  
惆悵未耕田半畝居然遊食似逃租

歲晚生徒罷品題歸來依舊伴山妻終年聚散如萍水  
到處流連剩雪泥蠶篋可能謀一醉牛衣難得淚雙啼  
空林日在風聲裏比翼何嘗得穩棲

十二月復自健歸

朝朝人自醉鄉回忽接徵書不待催餬口有方真磊落  
飫心無術漫低徊到家剛及日初短言別可堪花欲開  
門外一鞭疲馬緩征塵飛上望夫臺

甲子正月復赴健爲

桃花流水泛春人又逐東風住玉津頑僕竟成衣後影  
瘦妻翻似鏡中神紛紜事變都增慨咫尺天涯不可親

時復在家時作客恍從彌勒學分身

西風鎮日捲秋雲玉井梧桐一葉聞思婦可憐疑嫁賈  
秀才真箇似從軍潮如有信來千里月本無心滿十分

看到田間人餉盃當時悔不事耕耘

八月復自徙歸

纔得歸家又出門翻因慣別不銷魂雲山未問長安路

僕馬先尋故舊恩楓葉脫時秋有迹蘆花寒到月無痕

饑驅萬里吾何恃只有談天舌莫捫

八月還家九月復之捷爲

匹馬迢迢出劍關回頭爲別故鄉山心傷錦里家逾遠

路認羊腸夢好還林葉黯於遊子面澗花紅似美人顏

銷魂不待淋鈴雨一片猿愁落照間

十一月公車北上

天陰月黑叫鴟鴞膽落孤燈影動搖苦念蟬珠原是劫

驚聞雛卵竟爲妖計書千里封猶固墓草三秋色已凋

惟有弱魂能別我夢中曾不待崇朝

室人以產于前六月一日是夜京師旅邸夢

來告語相持大哭而醒至七月十三日信至始知真魂前時來別也

苦詩和淚自推敲落筆蜿蜒走黑蛟死學鰥魚思故水  
生憎燕雀構新巢開殘紅雨海棠瓣散盡綠煙楊柳梢  
篋裏故衣前日補爲緣針綫不能拋

懸知骸骨憾天涯萬里甯聞賦楚些欲識弱魂悲故土  
但看孤客痛無家秋風猛折相思樹冷雨難開稱意花  
太息彎弓彈不到蟾蜍蝕盡月西斜

家素貧且以洋未歸故僅頌諸郊外

世間聞說返魂香錦水燕雲道路長日夜有心封馬鬣  
風塵無計度羊腸愁來落葉都如雨望裏飛花不待霜

荷鍤未能嚴酒禁半由憔悴半佯狂

室人曾勸  
余節飲

輾轉終宵百感縈團圓好夢也難成悠悠總有重逢處  
耿耿曾聞不廢情生慣別離人薄倖死猶流落鬼吞聲  
孤棺七尺眠風雨藁葬何時得定塋

不知魂魄有無靈手寫哀文筆未停細想平時存約略  
空將後事慰叮嚀他生未卜餘來夢此紙多情勝梵經  
料得重泉難再讀淚花紅伴墨花青

圖成似否我先諳劫後頻將理細參底事英雄能擇婦  
偏因窈窕不宜男茫茫客路畱河朔黯黯歸心赴劍南  
念到夜臺消息絕無言相對更難堪

代答

自謂人間有百年匆匆未解惜當前尋常酒債賒將遍  
閱歷詩情補不全夢繞夔門餘戰壘魂飛劍閣尚烽煙  
將軍凱是生靈劫可忍重彈蜀國絃

咏雪與魯輿分體

名伯燕怪甫夫子  
之子廣東連平人

鄰雞未唱窗先明昨夜尚疑斜月晴破曉重簾纔手捲  
積素倒從門裏傾空中亂落瓊瑤屑剛風翦水花無聲  
青天不知何去處寒光上下相晶瑩瑞雪由來要盈尺  
蝗蝻入地難飛騰但願同雲此日九州齊覆被欣看明  
年萬戶都豐登

喜張岱菴夫子自山左至都

名人龍山  
東濮州人

善政無奇只是眞東風吹滿錦江春由來宰治兼師道

儘有門生是部民五袴歌聲畱後世三刀夢兆記前身  
何堪九陌飛塵裏同作長安索米人

商量舊業博公卿已是金門兩度行小草有心甘剝落  
春風何意苦生成憐才本是關真性補過無因得令名  
愁絕客鄉花外鳥聽來都似子規聲

大風戲作

飄空颯颯沙如雨黑夜鬼妖相對語一片潮聲天上來  
銀河破壞落平楚淒然屋際千鴟鳴怪絕庭中萬馬舞  
江干十月似聞雷塞下三時多嘯虎當面忽驚山影搖  
四散雲煙飛縷縷風兮風兮吾不願西極之西登崑崙  
亦不願東極之東超滄溟安能一夕冷然送我竟歸去

八十四盤峨眉頂上摩羣星

將之白泉口占

梅花預放隔年春  
匹馬還衝陌路塵  
客裏出門殊磊落  
不須回首別家人

涑水

清溪流水自潺潺  
小縣民家屋數間  
我當看詩人當畫  
夕陽紅透一痕山

易州

風寒壯士辭燕市  
日暮秦兵渡易河  
事不萬全亡可待  
休將劍術惜荆軻

白泉卽事

僧起客初睡客醒僧不知一聲鐘起處千里夢還時

龍口山日與顏樹厓參軍飲酒有作

百尺如登避債臺心空一鏡絕塵埃山搖暖翠日初出  
樹散寒煙風乍來酒政不容輕恕宥詩牌無事費低徊  
高談未欲言歸去可奈鐘聲夜半催